

Segun Director di D.O.W:

Ruta nobo pa Carnaval mester ta conoci aki dos siman



ORANJESTAD (AAN) - E dianan aki tin reunion ta tumando lugar entre Departamento di Obran Publico (DOW), Fundacion Carnaval Aruba (SAC), Cuerpo Policial (KPA) y Departamento di Infraestructura y Planificacion (DIP), relaciona cu escogencia di un ruta nobo pa carnaval.

Den entrevista cu DIARIO, ing. Jossy Figaroa, director di DOW, a elabora riba e proyecto aki, y con e deliberacion ta bayendo.

El a subraya cu e gruponan participante den carnaval ta hayando hopi di bisa den esaki, y nan ta bin na e reunionnan hunto cu SAC.

Nan a bin cu diferente ruta alternativo y e instancianan concerni ta duna nan chens pa trece esaki dilanti, y nan ta analiza cual ta e ventaha y desventahanan di cada ruta.

Figaroa a subraya cu e proceso aki ta bayendo completamente democratico, y SAC ta haciendo un bon trabao den e deliberacion aki cu e gruponan.

DOW ta scuchando hopi bon kico e gruponan kier bin cune. E prome ruta cu ing. Figaroa a sugeri y a trece den publicidad, e gruponan participante a bise cu esey no ta e ruta cu nan ta sinta warda.

Figaroa a bisa nan cu si nan tin otro ruta cu nan ta kere ta mehor, bin cune. Otro siman Diaranzon pa 10'or di mainta, nan ta bolbe sinta na mesa y lo trata di yega na final, pasobra locual nan a palabra cu otro ta cu prome cu vacacion grandi, esta mitad di Juli, e ruta mester ta completamente

conoci.

Cada instancia tin aspectonan cu nan kier pa ta riba e ruta y nan tin cu discuti riba esakinan, pa yega na un solucion adecua.

Figaroa a indica cu locual

DOW kier no ta tan determinante pa scoge e ruta. Un ehemplo ta cu semper tin riol unda cu nan ta ubica e trailernan cu wc. No obstante, asunto di riol no tin cu determina e ruta. Si no tin riol riba e ruta lo mester busca un otro forma pa solucion esaki.

DOW ta haya necesario pa tene cuenta cu polis, ambulance, brandweer, Cruz Cora, etc., pero no tin exigencianan pa bisa: "no, no por..." Figaroa a reitera cu importante ta cu Polis y DOW ta teniendo bon cuenta cu locual SAC y e gruponan participante, ta trece padilanti.